

周氏醫學鼓書



脈因證治

余自歸里後杜門不與世事接先太宜人病痰飲延葉眉壽治厯四年弗痊而眉壽謂爲痼疾難效因徧覽方書頗會其旨揀方以治不一年而瘳後遂旁搜博採窮幽極渺而於長沙河間東垣子和丹溪諸書尤三致意焉竊嘗謂醫之有長沙時中之聖也而四家並峙猶清任和之各成其聖偏焉而至者也學不從此叅究猶航斷港絕潢以望至於海也其能之乎但四家自河間東垣而外子和文多缺畧未爲全書丹谿著作類出門人記載惟聞脉因證治一書簡而該約而盡學者循是而窺長沙如得其舩與楫沿而不止固自不可量也而流傳絕少厯三十年未獲一觀心常怏怏歲乙未客有持

來示余欲廣諸同好亟請付梓不禁欣感交集以爲一
綫靈光忽然湧現眞爲棄榆之幸因不辭而爲之序以
弁其首

乾隆乙未仲夏吳趨繆遵義書於芝田山房

光緒辛卯仲冬
池陽周氏校刊

脈因證治卷一目錄

元丹溪朱震亨著

一卒尸

二痺

三瘰

四痿

五厥

六傷寒

七大頭腫痛

附蝦蟆瘟

八霍亂

九瘟病

十傷暑

十一瘧

十二疸

十三勞

勞極煩熱勞瘵

脈因證治卷一

元丹溪朱震亨著

一卒尸

脈寸口沉大而滑沉則爲實滑則爲氣實氣相搏厥氣入臟則死入腑則愈唇青身冷爲入臟死身和汗自出爲入腑則愈 緊而急者爲遁尸 少陰不至腎氣衰少精血爲尸厥 跌陽脈不出脾不上下身冷硬呼之不應脈絕者死 脈當大反小者死

證治在外者可治入裏者死 血氣并走於上則爲厥暴死素有痼疾新加卒病先治卒病 尸厥者昏不知人脈動如故開上焦心肺之陽自愈

尸厥脈動無氣氣閉靜而死也以

菖蒲屑內鼻兩孔中吹之令人以桂屑放舌下

又方 剔取左角髮方寸燒末酒和灌入喉立起

救卒死身熱者驗方

礬石半斤以水一斗五升煮消浸腳令沒踝蓋取礬性收瀉而歛其厥逆之氣

還魂湯 治卒死客忤死

麻黃

三兩去節

杏仁

八十箇去皮尖

炙甘草

一兩

右三味水八升煮取三升去粗入薑汁少許令咽之蓋取辛甘通陽氣發越邪氣故也

救卒死目閉方

搗薤汁灌耳中妙或吹皂莢末於鼻中立效薤汁
辟邪安魂莢末取噫開竅

救卒死張口反折方

灸手足兩爪後十四壯飲以五毒諸膏散

外有中惡中氣中食等狀與卒尸相類須詳諦脈證
而投之慎勿泛視誤人倉卒變通在神法難畢述

二痺

脈寸口喘而堅痺在心 喘而浮痺在肺 長而左右

彈痺在肝 大而虛痺在脾 堅而大痺在腎

因風風爲行痺風性善行 寒寒爲痛痺寒主收引

濕濕爲着痺濕本重滯 三氣致痺之原或外兼他

患之有之若舍此而能痺未有也

證其合而爲痺也以冬遇者骨痺春遇者筋痺夏遇者脈痺長夏遇者肌痺秋遇者皮痺久而不去內舍五臟之合待舍其合難治矣

痺論中議痺乃三氣皆可客於五臟其風寒濕乘虛而客之故也筋痺不去內舍於肝皮痺不去內舍於肺肌痺不去內舍於脾脈痺不去內舍於心骨痺不去內舍於腎其客於心則煩心上氣噎乾恐噫厥脹是也其客於肺使人煩滿而喘吐其客於肝多飲數洩小腹痛如懷妊夜臥則驚其客於脾四肢解墮發渴嘔沫上爲大瘰其客於腎善脹尻以代

踵脊以代頭 其客於腸數飲而小便不得中氣喘
爭時發飧洩夫大腸乃傳道之官爲沖和之氣三氣
乘虛客之而和氣閉矣水道不通使糟粕不化故喘
爭飧洩也 其客於胞小腹膀胱按之內痛苦沃以
湯小便澁上爲清涕夫三氣客於胞中則氣不能化
出故胞滿而水道不通隨經出鼻竅 其客於血脈
隨脈流通上下升降一身謂之周痺

華佗論痺乃邪氣合四時不正之氣感於陽氣所爲有
氣血筋肉骨之分 其氣痺者愁思喜怒過則氣結
於上久而不消則傷肺正氣衰邪氣勝留於上則胸
腹痛而不能食注於下則腰腳重而不能行貫於舌

則不言遺於腹則不溺壅則痛流則麻右寸脈沉而遲濇者是也 其血痺者飲酒過多懷熱太甚或寒折於經絡或濕犯於營衛因而血搏漸成枯削失血之證左寸脈結而不流利是也 其肉痺者飲食不節肥美之爲肉不榮膚不澤則紋理疎三氣入之則四肢緩而不收持右關脈舉按皆無力而澁也 其筋痺者由叫怒無時行步奔急淫邪傷肝肝失其氣寒熱客之流入筋會使筋急而不舒左關脈弦急而數浮沉有力是也 其骨痺者乃嗜慾傷於腎氣內消而不能閉禁邪氣妄入脈遲則寒數則熱浮則風濡則濕滑則虛治法各隨其宜

麻木餘辨 是風濕熱下陷入血分陰中陽氣不行
其證合目則渾身麻亦有痰在血分痒者血不營肌
腠

治附子湯 治風寒濕痺

附子炮去皮臍 桂枝 白芍 甘草 茯苓 人參各三錢

錢一兩

行痺加麻黃桂湯 痛痺加附子薑茯苓湯 胞痺

加四苓 腸痺加平胃茱萸草肉豆蔻等

戴人法苦劑湧寒痰次與痰劑使 白朮除濕 茯苓養腎

水桂伐木 薑 附寒勝加

麻木方 參助陽歸行 生甘草去熱 蒼蘗 白朮

苓除濕熱 升麻 柴胡 白芍 痰加二陳

忍冬藤膏 治五痺拘攣

三瘥卽瘥也

脈太陽發熱脈反沉細難愈 太陽證備脈沉遲此爲

瘥 寸口脈直上下行伏緊緊如弦 沉弦沉緊

少陰脈緊暴微者欲解

因血氣內虛四氣外襲 因濕諸瘥項強皆屬於濕寒

濕同性故濕可傷太陽

三因論狀身熱足寒頭強項急惡寒時頭熱面赤目赤

脈獨頭搖動卒噤角弓反張皆因血虛筋無所養邪

因人之故寒則緊縮熱則弛張風則弦急濕則脹緩

又有因瘡口未合風入之爲破傷風濕入之爲破傷
濕與瘡同但少頭強項急餘並相如

又有因汗下過多

又有產後怒氣致此病者 項強亦有痰者

證有汗而不惡寒名柔瘧 無汗口噤腳攣名剛瘧
治宜流濕祛風緩表而安 詳有無汗而藥之

柔瘧葛根加桂湯 剛瘧大承氣湯 葛根湯汗之
有表證可用 大承氣下之有裏證可用

四痿

脈浮而大浮虛大熱 滑而大滑痰大虛 洪而緩洪
熱緩虛

因腎水不能勝心火火上燥肺金六葉皆焦皮毛虛弱
急而薄着者則生痿躄皆因貪慾好色之故濕痰亦
能爲之

經論有由悲哀太甚陽氣內動數洩血大經空虛熱起
於心病則樞紐如折不相提挈名曰脈痿

有思想無窮入房太甚宗筋弛縱熱入於肝病則筋
急而爪枯名曰筋痿

有由濕地以水爲事熱生於脾病則胃乾而渴肌肉
不仁名曰肉痿

有因遠行勞倦遇大熱而渴陽氣內乏熱舍於腎病
則腰脊不舉骨枯而髓減名曰骨痿 然此皆熱薰